

REGIUN ALVRA/PARC ELA: local d'elaboraziun per products da muntogna

## En'ideia betg nova survign nov tgatsch

**pb. Dad er elaborar products regiunals ainten la regiun per tigneir cò la creaziun da valour, chegl è fitg impurtant. Ma ideal fiss en li central per saveir elaborar, magasinar e far la distribuziun. Chegl è gio sto avant onns en tema ainten la regiun, ossa è el nia puspe actual. Er ansemen cun ena tgesa da maz ainten la regiun. I dat gio en project ad Alvaschagn.**

Avant divers onns davigl ainten la regiun en project per ena tratga da salmungs ainten la zona d'industria ad Alvaschagn, sot la garscha Projer. A madem mument era er an discussiun ena manufactura per products agrars agl madem li. Dasperas l'elaboraziun, igl pachetadi e la distribuziun resp. spediuziun digls salmungs ins vess er lia promover cotras la cultivaziun da products agrars scu tiffels, ervas ed otras tgosas. Tgenegnas exact era anc betg fixo definitivamaintg. Ena gruppa da pours interessos era cò vedlonder. Scu tgi savagn oz è la tratga da salmungs rivada giu Lostallo e siva dalla stad 2018 vign produtgia igl amprem salmung outdoor an Svizra. Cun eir la tratga da salmungs orsoura è er svaneida l'ideia dad ena manufactura per products agrars.

### Igl basigns è resto

En project tgi vess do impuls economics alla regiun ed an spezial all'agricultura è sto davent. Aint igl frataimp èn pero igls products

regiunals davantos anc pi divers ed er igl quantum è carschia. Er igl basigns da saveir elaborar chels, pachetar, magasinar ed alla finala ed distribueir è cotras angal carschia. Igl basigns per en center logistic per products regiunals.

Ossa è igl tema nia mess puspe sen tapet. Chest'eda inziia digl Parc Ela resp. digl svuluppader regiunal, Daniel Kunfermann tgi lavoura gio er per igl parc dalla nateira. Tranter oter è er nia institua ena gruppa da lavour tgi è sa deditgeida alla produziun ed elaboraziun da fretga e pomma ainten la Regiun Alvra. Glindesde passo è stada a Casti ena seira d'infurmaziun publica. Cò on dus commembers dalla gruppa rapporto sur dalla lavour. Chegl eran Thomas Egli da Casti tgi stat avant all'uniun da poma e Marcel Heinrich.

Thomas Egli ò rapporto tgi el vegia fatg ensatge scu en inventar dallas plantas da poma ainten la Regiun Alvra. I detta ca. 1500 plantas da poma ed 80% seian meilers. Igl ples pumers seian pero vigls, vot deir daple tgi 40 onns. El vegia er catto blera poma giu mez e via tgi duvress capacitads per elaborar la poma. Ins vegia er fatg en'amprema amprova da far most or dalla meila a Mon. E chegl cun 3,5 tonnas meila.

Marcel Heinrich ò managea tgi igls costs fixes per elaborar seian mengia ots. Ins vegia da far diversas tgosas an divers lis. I duvress propa en local central per tgi la tgossa davainta er en tant economica e betg mintgign vegia igls daners per cumparar las apparatus

ras ed igls indrezs per elaborar igls products (p. ex. per far most). Avant ins veva societads per l'egn u l'oter scopo ainten l'agricultura. Igl davos decennis seian chellas neidas schlieidas se. I fiss ossa forsa puspe bung da fundar societads per far la vendita directa pi ferma. Seia chegl per elaborar igls products, per augmentar igl quantum da vendita, per magasinar, per la coordinaziun ed ansomma per tot las dumondas logiosticas. Ena ferma vendita directa cun bungs products regiunals nizegia agls pours, agl commers da detagl, alla gastronomia ed alla fegn agl antier turissem.

Igl pour da tiffels da Filisour è sto da curt alla fiera da slow-food a Turitg. El vegia stuia constatar tgi la mesadad digls offeriders vignan dall'Austria e dall'Italia. I fiss taimp tgi igls pours dallas nossas regiun sa fetschan pi independents e seian betg angal adegna ve dalla spegna digls paiamaints directs.

### I dat anc bleras dumondas

Glindesde seira a Casti ins ò alloura anc fatg en luvratori dad ideias. An quatter gruppas è nia discuto generalmaintg sur dall'ideia dad en center logistic regional per products dalla regiun. Ins ò tschartgea da catar raspostas tar las suandontas dumondas: vignigl ansomma a gartager da stgaffier en local central disponibel per las diversas spartas dalla vendita directa? Gartegigl da biagier se ena organizaziun da distribuziun? Dovrigl persiva ena ena societad u tgi duess esser purtader? Antras la discussiun sen igls divers posts ins ò generalmaintg via tgi i dat en ferm basigns per en tal center, tgi dat pero anc bleras dumondas da sclareir.

Ins è er nia tar en'otra conclusiun, tgi per en tal center logistic duess er neir nizigia las pussebladads dalla digitalisaziun tgi sustignan aint igl proceder da magasinar, amputar, distribueir igls products regiunals.

Daniel Kunfermann ò alloura rimno tot igls inputs e tot las dumondas anc avertas an connex cun chest center. El vign ad evaluar las tgosas ed enscuras publictier igls resultats. Pinavant ò igl sviluppader regional er repartia figls da dumondas cun ena retschertga per survagneir ulteriours infurmaziuns. Er chellas vign el ad integrar ainten en rapport. Digl reminent eran er dus representants digl uffez cantunal per agricultura dalla parteida tgi on accompagna la seira cun cunsegl ed infurmaziuns. Els on er komunitgia tge tgi ins dastgess spitgier digl uffez an chella dumonda.



Ena gruppa da lavour durant igl workshop è s'occupada digl tema dad en center logistic per products regiunals e dalla problematica tgi stat an chel connex.